

Publication: 超班馬簿
Title: 巫斯義新任高寶集團主帥
Date: 8 March 2018
Link: P.72

Full Article:



巫斯義新任高寶集團主帥

法國名將巫斯義呢兩年四出奔走，但仍把握機會，藉老友馬主賴偉智隻「壯思飛」角逐大賽重臨，單就上季以呢匹馬四度舊地重遊，三P一第五全有獎金，不過今季就失色啲，拍住「壯思飛」三次都係陪跑，可能馬老了打咗折扣，最緊要巫仔自己身手依然，尤其佢剛獲簽聘為首席騎師，而且新老闆係香港人，所以話人生峰迴路轉，時來運到，真係唔到你唔信。

巫斯義呢位新老闆，在香港馬主界可能有少少陌生，但早已留名，且與巫仔有多少淵源；簽佢嘅Johnny韓世灝博士，早幾年有匹「極霸戰道」交文家良主理，當時二人仲未以將帥姿態上陣，「極霸戰道」就由巫仔跑過兩次無功，點知事

隔五年半，竟會於歐洲攜手。話時話Johnny爸爸韓德森，早在六十年代已經係馬主，八十年代嘅「金太陽」及「金太子」，贏馬都帶挈過霞姨架！

講番Johnny，佢係高寶集團主席兼創辦人，高寶集團活躍於私募股權、風險投資、金融企業，業務包括銀行、生物醫學、教育、傳媒娛樂、礦產及房地產等行業，喺全球多國都有Office，表面一切同賽馬無關，實際當然唔係，Johnny旗下體育投資附屬公司Global Group Sports Investment，喺英國以至全球擁有超過四十駒，由幾位大練馬師鄧樂普(Ed Dunlop)、



韋嘉(Ed Walker)、侯耀誠(Charles Hills)等主理，Johnny本身好錫馬，好似隻Global Giant上年兩歲贏完，等遲吓三歲中再成長先復出，正因為新力軍眾多，要搵個夠卡士做長期戰友，今與巫仔一拍即合，睇嚟呢個歐洲夏天，佢哋頭馬必陸續有來！